

四庫全書

集部

欽定四庫全書

集部

文章辨體彙選卷一百

六十二

詳校官中書臣實汝翼

主事銜臣徐以坤覆勘

總校官檢討臣何思鈞

校對官中書臣吳垣

謄錄監生臣劉天倫

欽定四庫全書

文章辨體彙選卷二百六十

明 賀復徵 編

尺牘二

答侯霸

漢嚴光

君房足下位至鼎足甚善懷仁負義天下悅阿諛順旨
要領絕

遺李軾

馮異

蕭王跋跬霜雪經營河北方今英俊雲集百姓風靡雖
邠岐慕周不足以喻季文誠能覺悟成敗亟定大計論
功古人轉禍為福在此時矣

誠兄子書

馬援

吾欲汝曹聞人過失如聞父母之名耳可得聞口不可
得言也好論議人長短妄是非正法此吾所大惡也寧
死不願聞子孫有此行也汝曹知吾惡之甚矣所以復
言者施襟結褱申父母之戒欲使汝曹不忘之耳龍伯

高敦厚周慎口無擇言謙約節儉廉公有威吾愛之重
之願汝曹效之杜季良豪俠好義憂人之憂樂人之樂
清濁無所失父喪致客數郡畢至吾愛之重之不願汝
曹效也效伯高不得猶為謹勅之士所謂刻鵠不成尚
類鶩者也效季良不得陷為天下輕薄子所謂畫虎不
成反類狗者也

戒馬廖

楊終

詩云皎皎素絲在所染之上智下愚謂之不移中庸之

流要在教化黃門郎年幼血氣方盛既無長君退讓之風而要結輕狡無行之客縱而莫誨視成盛性鑒念前世可為寒心君侯誠宜以臨深履薄為戒

臨終與胡廣趙戒

李固

固受國厚恩是以竭其股肱不顧死亡志欲扶持王室何圖一朝梁氏迷謬公等曲從以吉為凶成事為敗乎漢家衰微從此始矣公等顛而不扶傾覆大事後之良史豈有所私固身已矣於義得矣夫復何言

辭郡辟

蔡邕

中屠蟠稟氣玄妙性敏心通喪親盡禮幾於毀滅至行
美誼人所鮮能安貧樂潛味道守真不為燥濕輕重方
之於邕以齒則長以德則賢

貽李膺

荀爽

天子當貞觀二五利見大人不謂夷之初旦明而未融
虹蜺揚輝棄和取同方今天地氣閉大人休否智者見
險投以遠害雖匱人望內合私願想甚欣然不為恨也

願怡神無事偃息衡門任其飛沉與時抑揚

與郭叔都

荀爽

陳秀方才德秀出超世逸羣金相玉質文章虎變終軍
賈誼誠無以加宜遂貢之宰朝盛其龍光鹽車之驥自
非伯樂無以顯名採光剖璞以獨見寶實為足下利之

與崔子真

張奐

僕到任有見兵二百馬如殺羊矛如鍔錐盾如榆葉

與弟固

李固

固今年五十有七鬢髮已白所謂容身而游滿腹而去
周觀天下獨未見益州耳昔嚴夫子嘗言經有五涉其
四州有九游其八欲類此子乎

按此非李太尉也太尉益州人年五十四

與妻徐淑書

秦嘉

不能養志當給郡使隨俗順時俛俛當去知所苦故爾
未有瘳損想念悒悒勞心無已當涉遠路趨走風塵非
志所慕慘慘不樂又計往還將彌時節念發同怨意有
遲遲欲暫相見有所屬託今遣車往想必自力

重與妻

秦嘉

車還空返甚失所望兼叙遠別悵悵之情顧有悵然間
得此鏡既明且好形觀文彩世所希有意甚愛之故以
相與並寶釵一隻好香四種素琴一張常所自彈也明
鏡可以鑒形寶釵可以耀首芳香可以馥身素琴可以
娛耳

答秦嘉書

徐淑

知屈珪璋應奉歲使策名玉府觀國之光雖失高素皓

然之業亦是仲尼執鞭之操也自初承問心願東還迫
疾唯宜抱歎而已日月已盡行有伴例想嚴裝已辦發
邁在近誰謂宋遠企予望之室邇人遐我勞如何深谷
逶迤而君是涉高山岩岩而君是越斯亦難矣長路悠
悠而君是踐冰霜慘冽而君是履身非形影何得動而
輒俱體非比目何得同而不離於是詠萱草之喻以消
兩家之思割今者之恨以待將來之歡今適樂土優游
京邑觀王都之壯麗察天下之珍妙得無目玩意移往

而不能出耶

又荅秦嘉

徐淑

既惠音令兼賜諸物厚顧殷勤出於非望外鏡有文彩
之麗釵有殊異之觀芳香既珍素琴益好惠異物於鄙
陋割所珍以相賜非豐恩之厚孰肯若斯覽鏡執釵情
想髣髴操琴詠詩思心成結勅以芳香馥身喻以明鏡
鑒形此言過矣未獲我心也昔詩人有飛蓬之感班婕
妤有誰榮之嘆素琴之作當須君歸明鏡之鑒當待君

還未覩光儀則寶釵不列也未侍帷帳則芳香不發也

寄子元珪季珪

杜秦姬

中人情性可上下也在其檢耳若放而不檢則入惡也
昔西門豹佩韋以自寬宓子賤帶弦以自急故能改身
之恒為天下名士

與韋林甫

孔融

前日元將來雅度弘毅昨仲將來開敏篤誠不意雙珠
近出老蚌甚珍貴之遺書通心

遺張紘

孔融

前勞手筆多篆書每舉篇見字欣然獨笑如復覩其人
也

與張紘

孔融

聞大軍西征足下留鎮不有居者誰守社稷深固折衝
亦大勲也無乃李廣之氣倉卒益怒樂一當單于以盡
餘憤乎南北並定世將無事孫叔投戈絳灌俎豆亦在
今日但用離析無緣復會面為愁歎耳

與邴原

孔融

隨會在秦賈季在翟諮仰靡所歎息增懷頃知來至近
在三山詩不云乎來歸自鎬我行永久今遣五官掾奉
問榜人舟楫之勞禍福動靜告慰亂階而已阻兵之雄
若暴喪爭梟

與曹操論酒禁書

孔融

公初當來邦人咸忤舞踴躍以望我后亦既至止酒禁
施行夫酒之為德久矣古先哲王類帝禋宗和神定人

以濟萬國非酒莫以也故天垂酒星之耀地列酒泉之
郡人著旨酒之德堯不千鍾無以建太平孔非百觚無
以堪上聖樊噲解厄鴻門非豕肩鍾酒無以奮其怒趙
之廝養東迎其王非引卮酒無以激其氣高祖非醉斬
白蛇無以暢其靈景帝非醉幸唐姬無以開中興袁盎
非醇醪之力無以脫其命定國非酣飲一斛無以決其
法故酈生以高陽酒徒著功于漢屈原不餉糟歆醕取
困於楚繇是觀之酒何負於政哉

其二

昨承訓荅陳二代之禍及衆人之敗以酒亡者實如來
誨雖然徐偃王行仁義而亡今令不絕仁義燕噲以讓
失社稷今令不禁謙退魯因儒而損今令不棄文學夏
商亦以婦人失天下今令不斷婚姻而將酒獨急者疑
但惜穀耳非以亡王為戒也

戒子

司馬徽

聞汝充役室如懸罄何以自辨論德則吾薄說居則吾

貧勿以薄而志不壯貧而行不高也

與王匡

胡母班

僕與太傅馬公太僕趙岐少府陰脩俱受詔命關東諸
郡雖實嫉卓猶以銜奉王命不敢玷辱而足下獨囚僕
於獄欲以釁鼓此悖暴無道之甚者也死人之所難然
恥為狂夫所害若亡者有靈當訴足下於皇天亡人子
二人則君之甥身沒之後慎勿令臨僕尸骸也

蜀先主答孫權

備與璋託為宗室冀憑英靈以匡漢朝今璋得罪左右
備獨竦懼非所敢聞願加寬貸若不獲請備當散髮歸
於山林

其二

益州民富強土地險阻劉璋雖弱足以自守今暴師於
蜀漢轉運於萬里欲戰克攻取舉不失利此吳起不能
定其規孫武不能善其事也識者見操失利於赤壁謂
其力屈無復遠志今操三分天下已有其二將欲飲馬

於滄海觀兵於吳會何肯守此坐須老乎今同盟無故
自相攻伐借樞於操使敵承其隙非長計也

與關雲長

蜀諸葛亮

孟起兼資文武雄猛過人一世之烈黥彭之徒當與益
德並驅爭先未若髯之絕倫逸羣也

與兄瑾

諸葛亮

殷往嗣秀才之僑盼者也東吳菰蘆中乃有奇偉如此
人

其二

瞻今已八歲聰惠可愛嫌其早成不為重器

與蔣琬

諸葛亮

孝起前為吾說正方腹中有鱗甲鄉黨以為不可近吾謂鱗甲者但不當犯之耳不圖復有蘇張之事也

與張裔

諸葛亮

君昔在栢下營壞吾之用心食不知味後流迸南海相為悲嘆寢不安席及其來還委付大任同獎王室自以

為與君古之石交也石交之道舉讐以相益割骨肉以相明猶不相謝也況吾但委意於元儉而君不能忍耶

其二

去婦不顧門姜韭不入園以婦人之性草菜之情猶有所恥想忠壯者意何所之

與留府長史叅軍

諸葛亮

姜伯約忠勤時事思慮精密考其所有永南季常諸人不如也其人涼州上士也

誠子 諸葛亮

夫君子之行靜以脩身儉以養德非澹泊無以明志非
寧靜無以致遠夫學須靜也才須學也非學無以廣才
非靜無以成學惱慢則不能研精險躁則不能理性年
與時馳意與歲去遂成枯落悲嘆窮廬將復何及

諫諸葛亮書 楊顓

為治有體上下不可相侵請為明公以作家譬之今有
人使奴執畊稼婢典炊爨雞主司晨犬主吠盜牛喘重

載馬涉遠路私業無曠所求皆足雍容高枕飲食而已
忽一旦盡欲以身親其役不復付任勞其體力為此碎
務形疲神困終無一成豈其知之不如奴婢鷄狗哉失
為家主之法也是故古人稱坐而論道謂之王公作而
行之謂之士大夫故邴吉不問橫道死人而憂牛喘陳
平不肯知錢穀之數云自有主者彼誠達於位分之體
也今明公為治乃躬自校簿書流汗竟日不亦勞乎

與諸葛亮書

漢馬良

聞雒城已拔此天祚也尊兄應期贊世配業光國魄兆
見矣夫變用雅慮審貴垂明於以簡才宜適其時若乃
和光悅遠邁德天壤使時閑於聽世服於道齊高妙之
音正魯衛之聲並利於事無相奪倫此乃管絃之至牙
曠之調也雖非鍾期敢不擊節

與所親

蜀張裔

近者涉道晝夜接賓不得休息人自敬丞相長史男子
張君嗣附之疲倦欲死

臨終與孔明

馬謖

明公視謖猶子謖視明公猶父願深惟殛繇用禹之義使平生之交不虧於此謖雖死無恨於黃壤也

答王商

秦宓

以國君之賢子為良輔不以是時建蕭張之業未足多也僕得曝背乎隴畝之中誦顏氏之簞瓢詠原憲之蓬戶時翱翔於林澤與沮溺之等儔聽玄猿之悲吟察鶴鳴於九臯安身為樂無憂為福處空虛之名居不靈之

龜知我者稀則我貴矣斯乃僕得志之秋也何困苦之
戚焉

魏武帝與楊太尉書

操白與足下同海內大義足下不遺以賢子見輔比中
國雖靖方外未夷今軍征事大百姓騷擾吾制鐘鼓之
音主簿宜守而足下賢子恃豪父之勢每不與吾同懷
即欲直繩顧頗恨恨謂其能改遂轉寬舒復即宥貸將
延足下尊門大累便令刑之念卿父息之情同此悼楚

亦未必非幸也謹贈足下錦裘二領八節角桃杖一枝
官絹五百匹錢六十萬四望通憶七香車一乘青犢牛
二頭八百里驊騮馬一匹赤戎金裝鞍轡十副鈴苞一
具驅使二人并遺足下貴室錯雜綵羅縠裘一領織成
鞞一量有心青衣二人長奉左右所奉雖薄以表吾意
足下便當慨然承納不致往返

武帝答袁紹

董卓之罪暴於四海吾等合大衆興義兵而遠近莫不

嚮應此以義動故也今幼主微弱制于姦臣未有昌邑
亡國之釁而一旦改易天下其孰安之諸君北面我自
西向

武帝遺孫權書

近者奉辭伐罪旌麾南指劉琮束手今治水軍八十萬
衆方與將軍會獵於吳

武帝與荀彧

與君共事已來立朝廷君之相為匡弼君之相為舉

人君之相為建計君之相為密謀亦以多矣夫功未必皆野戰也願君勿讓

其二

郭奉孝年不滿四十相與周旋十一年險阻艱難皆共罹之又以通達見世事無所疑滯欲以後事屬之何意卒爾失之悲痛傷心今表贈其子滿千戶然何益亡者追念之感深且奉孝乃知孤者也天下之人相知者少又以此痛惜柰何

武帝與鍾繇

得所送馬甚應其急關右平定朝廷無西顧之憂足下之勲也昔蕭何鎮守關中足食成軍亦適當耳

卞后與楊太尉夫人

卞頓首貴門不遺賢郎輔佐每感篤念情在凝至賢郎盛德熙妙有蓋世文才闔門欽敬寶用無已方今騷擾戎馬屢動主簿股肱近臣征伐之計事須敬咨官立金鼓之節而聞命違制明公性急忿然在外輒行軍法卞

姓當時亦所不知聞之心肝塗地驚愕斷絕悼痛酷楚情不自勝夫人多容即見垂怒故送衣服一籠文絹百疋房子官錦百斤私所乘香車一乘牛一頭誠知微細以達往意望為收納

文帝與大理王朗

生有七尺之形死為一棺之土唯立德揚名可以不朽其次莫如著篇籍疫癘數起士人彫落余獨何人能全其壽

文帝答繁欽

披書歡笑不能自勝頃守官王孫世有女曰瑣年始九歲
夢與神通寤而悲吟哀聲激切涉厯六載于今十五素
顏玄髮皓齒丹脣提袂徐進楊蛾微眺芳聲清激逸足
橫集然後修容飾粧改曲變度斯謂聲協鍾石氣應風
律今之妙舞莫巧於絳樹清歌莫善於宋牼豈能上亂
靈祇下變庶物漂悠風雲橫厲無方若斯也哉固非車
子喉轉長吟所能逮也吾練色徵聲雅應此選謹卜良

日納之閒房

文帝賜劉楨

物因人為貴故在賤者之手不御至尊之側今雖取之
勿嫌其反也

文帝與吳監

中國珍果甚多蒲桃當其朱夏涉秋尚有餘暑醉酒宿
醒掩露而食甘而不餇脆而不酸冷而不寒味厚汁多
除煩解倦釀以為酒甘於麴蘖喜醉而易醒道之固已

流瑛咽嗑況親食之南方有橘醋正裂人牙時有甜耳
他方之果寧有匹者

文帝與鍾繇

袁王國士更為脣齒荀宏勁悍往來銳師真君侯之勳
敵左右之深憂也

與楊訓 魏崔琰

省表事佳耳時乎時乎會當有變

曹公進爵為主訓表
稱頌琰戒之曹公見

之遂殺琰疑
其異已也

荅張紘

陳琳

自僕在河北與天下隔此間率少於文章易為雄伯故
使僕受此過差之談非其實也今景興在此足下與子
布在彼所謂小巫見大巫神氣盡矣

上陳思王

劉楨

君侯採庶子之春華忘家丞之秋實為上招謗其罪不
小愚實懼焉

與劉公幹書

應璩

鵲鷖棲翔鳳之條
黿鼉游昇龍之淵
識真者所為憤結也

與曹公

應璩

昔漢光武與戴子良有撫塵之好

與尚書諸郎書

應璩

檀氏園葵菜繁茂
諸蔗瓜芋亦離離
尚萌未知三生復何種植

與劉文真書

應璩

足下內挹叔夷之清節外播二南之惠政德教加於百姓要道過於侏國之卿也

與陰中夏書

應璩

體正者則檢於人質弱者則陋於衆

與許子俊書

應璩

足下以方剛之盛年應不羈之勁勇將發號虎之威致霜雪之誅擒吳鳥蜀定功萬里而劉備不下山孫權不出水武力不奮猛氣畜勇其毒何如

與龐惠恭書

應璩

頃見所上利民之術植濟南之榆栽漢中之漆

報燕中尉樊彥皇

應璩

登輿北踐燕趙路分當化銀龜以為黃變青組以為紫

答司馬懿

田豫

年過七十而以居位譬如鐘鳴漏盡而夜行不休是罪人也

與司馬懿

郭淮

五子哀戀思念其母其母既亡則無五子五子若殞亦復無淮

與虞翻

吳長沙桓王孫策

今日之事當與卿共之勿謂孫策作郡吏相待也

吳大帝與曹操

春水方生公宜速去

上孫權

周瑜

劉備以梟雄之姿而有關侯張飛熊虎之將必非久屈

為人用者愚謂大計宜徒備置吳越為築宮室多其美女玩好以娛其耳目分此二人各置一方使如瑜者得挾與攻戰大事可定也今猥割上地以資業之聚此三人者俱在疆場恐蛟龍得雲雨終非池中物也

與孔融

張紘

虞仲翔前頗為論者所侵美玉琢磨益光不足以損

與漢昭烈

魯肅

龐士原非百里才也使處治中別駕之任始當展其驥

足耳

與全琮

陸遜

子弟苟有才不憂不用不宜私出以要榮利若其不佳
終為取禍

與友人論草書

皇象

欲見草書宜得精毫毫筆曲委宛轉不叛散者紙當得
滑密不粘汚者墨又須多膠紺黝者如逸豫之餘手調
適而心佳娛可以小展

與弟

虞翻

長子容當為求婦遠求小姓足使生子天之福人不在
貴族芝草無根醴泉無源

與客

虞翻

僕聞琥珀不取腐芥磁石不受曲鍼過而不存不亦宜
乎

臨終授書

孫仲奇妹

鏡與粉盤與郎香奩與若欲其行身如明鏡純如粉譽

如香

文章辨體彙選卷二百六十

欽定四庫全書

文章辨體彙選卷二百六十一

明 賀復徵 編

尺牘三

與阮瞻書

晉東海王越

禮年八歲出就外傳明始可以加師訓之則十年曰幼
學明可以漸先王之教也然學之所入淺禮之所安深
是以閑習禮容不如式瞻儀度諷誦遺言不如親承音

旨小兒毗既無令淑之質不聞道德之風望諸君時以
閒豫周旋誨接

與從弟琇書

羊祜

吾以布衣忝荷重任每以尸素為媿天命既隆惟江南
未夷此人臣之責是以不量所能畢力吳會當憑朝廷
之威賴士大夫之謀以余克之舉除萬世之患年已朽
老既定邊事當自角巾東路還歸鄉里於墳墓側為容
棺之墟假日視息思與後生味道此吾之至願也以凡

才而居重位何能不懼盈滿之責耶疏廣吾師也聖主
明恕當不奪微志爾

與傅咸

楊濟

江海之流混混故能成其深廣也天下大器非可稍了
而相觀每事欲了生子癡了官事官事未易了也了事
正作癡復為快耳左丞總司天臺維正八座此未易居
以君盡性而處未易居之任益不易也想慮破頭故具
有白

荅楊濟

傅咸

衛公云酒色之殺人此甚於作直坐酒色死人不為悔
逆畏以直致禍此由心不正直正欲以苟且為明哲耳
自古以直致禍者當自矯枉過直或不忠允欲以亢厲
為聲故致忿耳安有慳慳為忠益而當見疾乎

與從弟孝徵

孫氏瓊鈕治母

省爾譏我以養鵠乃戒以衛懿滅斃之禍斯言惑矣吾
未之取衛懿之好民無役車之載鶴有乘軒之飾禍敗

之由由乎失所若乃開圃匹於靈囿沃池矩乎神沼文
魚躍於白水素鳥翔乎神州豈非周文之德大雅所脩
哉夫嘉肴旨酒非不美也夏禹盛以陶豆殷紂貯以玉
杯而此聖以興彼愚以滅蓋置之失所如其無失來難
可施乎

與虞定夫人薦環夫人

孫氏瓊

瓊聞興賢崇德聖主令典旌善表操有邦盛務伏見族
祖吳國亡民富春孫彥妻環少厲令節服膺道教逮適

孫氏恪居婦職宗姻有聲奉禮未周彥母喪殞半年彥
奄亡沒環率禮奉終抗義明節傾竭私產以供葬送禮
服既終前無立子家欲改醮誓而不許

與妹劉氏

陳氏徐藻妻

見偉方所作先君誄其述詠勲德則仁風靡墜其言情
訴哀則孝心以叙執咏反覆感賴交集輒不自量有疑
一言略陳所懷庶備起予先君既體弘仁義又動則聖
檢道長祚短時乏識真榮位未登高志不遂本不標方

外蹟者也老莊者絕聖棄智渾齊萬物等貴賤忘哀樂
非經典所貴非名教所取何必輒引以為喻耶可共詳
之

與褚陶

張華

二陸龍躍於江漢彥先鳳鳴於朝陽自此以來嘗恐南
金已盡而復得之於吾子故知延州之德不孤淵岱之
寶不盡

荅雷煥

張華

所致詳劔文乃干將也莫邪可復至不雖然天生神物終當合耳

與弟雲

陸機

此間有一傖父欲作三都賦須其成以覆酒甌耳

與楊彥明書

陸雲

陸雲白省示累紙重存往會益以增歎年時可喜何速之甚昔年少時見五十公去此甚遠今日冉冉已近之已耳順之年行復為憂歎也柯生而多悅樂春未厭秋

風行戒已悲落葉矣人道多故懽樂恒乏遨遊此世當
復幾時各爾永隔良會每難懷想親愛寤寐無忘書無
所悉

與平原書

陸雲

一日案行并視曹公器物牀薦席具寒夏被七枚介幘
如吳幘平天冠遠遊冠具在嚴器方七八寸高四寸餘
中無帛如吳小人嚴具牀刷膩處尚可識疏枇剔齒纖
縋皆在拭目黃絮二在垢垢黑目淚所沾汚手衣卧籠

挽蒲棋局書箱亦在奏案大小五枚書車又作岐案以
卧視書扇如吳扇要扇亦在書箱想兄識彥高書箱甚
似之筆亦如吳筆硯亦爾書刀五枚琉璃筆一枝所希
聞景初三年七月劉婕妤析之見此期復使人悵然有
感處器物皆素今送鄴宮大尺間數前已白其總帳及
望墓田處是清河時臺上諸奇變無方常欲問曹公使
賊得上臺而公但以變譎因旋避之若焚臺當云何此
公似亦不能止文昌殿北有閣道去殿文內中在東殿

東便屬陳留王內不可得見也

其二

三上臺曹公藏石墨數十萬斤云燒此消復可用然煙
中人不知頗見之不今送二螺省曹公遺事天下多意
長才乃當爾作弊屋向百年于今正平夷塘乃不可得
壞便以斧斫之耳爾定以知吏稱其職民安其業也

與兄弟書

寡婦淑

蓋聞君子導人以德矯俗以禮是以烈士有不移之志

貞女無迴二之行淑雖婦人竊慕殺生成義死而後已
夙遭禍罰喪其所天男弱未冠女幼未笄是以傴僂求
生將欲長育二子上奉祖宗之嗣下繼祖禰之禮然後
覲於黃泉永無慚色仁兄德弟既不能厲高節於弱志
發明德於闇昧許我從人逼我於上乃命官人訟之簡
書夫智者不可惑以事仁者不可脅以死晏嬰不以白
刃臨頸改正直之辭梁寡不以毀形之痛忘執節之義
高山景行豈不思齊計兄弟備托學門不能匡我以道

博我以文雖曰既學吾謂之未也

謝遣妻孫氏書

許邁

歟聞懸雷之響山鳥之鳴自為簫韶九成不能勝也偶
景青窓之下棲息巖岫之室以為殿堂廣廈不能過也
情願所終志絕於此吾其去矣長離別矣

荅夫許邁

孫氏

愚下不才侍執巾櫛榮華福祿相與共之如何君子駕
其大義輕見斥逐若以此處遐曠非婦人所便昔梁生

涉嶺孟光是攜簫史登臺秦女不舍衛人脩義夫妻同行老萊逃名伉儷俱逝豈非古人嘉遯之舉者許君乖離矣

荅許長史

王夫人雲林右英

夫學道者當得專道注真情無散念揆奢侈保冲白寂然如密有所覩熙然如潛有所得專專似臨深谷戰戰如履薄冰始得道之門耳猶未得道之室也所謂為難者學道也所謂為易者學道也寂然沉味保和天真注

神棲靈耽研六府惜精閉北無視無聽此道之易也即是不能行此者所以為難許侯研之哉斧子瑩之哉墮之者禍敗積矣

授荅許長史

王夫人

凝心虛形內觀洞府抱玄守神專守真一者則頭髮不白禿者更髣未有以百思纏胸寒熱破神營此官務當此風塵口言吉凶之會身靡得失之門衆憂若是萬慮若此雖有真心固為不篤抱道不行握寶不用而自然

望頭不白者亦希聞也玉醴金漿玄生神梨方丈火棗
玄光靈芝我當與山中許道士不以與人間許長史也

六月一十九日夜授楊義書

九華安妃紫清上
宮

日者霞之實霞者日之精君唯聞服日實之法未見知
餐霞之精也夫餐霞之經甚秘致霞之道甚易此謂體
生玉光霞映上清之法也眼者身之鏡耳者體之牖視
多則鏡昏聽衆則牖閉妾有磨鏡之石決牖之術即能
徹洞萬靈眇察絕響可乎面者神之庭髮者胸之華心

悲則貌焦腦滅則髮素所以精元內喪丹精損竭也妾
有童面之經還白之法可乎精者體之神明者身之寶
勞多則精散營竟則明消所以老隨氣落耄已及之妾
有益精之道延明之經可乎此四道乃上清內書立驗
之真章也方欲獻示以補助君之明照耳

與親故

劉琨

吾枕戈待旦志梟逆虜恒恐祖生先吾著鞭

與人

王澄

彦國吐佳言如鋸木屑霏霏不絕誠為後進領袖也

謂胡

母輔之也

其二

兒微風氣日上足散人懷

與人

王導

周侯雅流弘器何可得遺

周為荊州益傳密等所敗未得用

寄王廙

王導

虎牴虎犢還其所如

與僚屬

王敦

昔王輔嗣吐金聲於中朝衛玠今復玉振於江表不意永嘉之中復聞正始之音阿平若在當復絕倒

與王導

王敦

溫太真別來幾日作如此事當募人生致之自拔其舌

楊云觀敦與導書如此敦之逆謀導豈不知蓋坐觀成敗敦勝則從敦晉勝則從晉千古漏網之賊也其得美名者子孫貴盛彌縫之也

上琅琊王薦南人士

顧榮

陸士光真正清貴金玉其質甘季思忠款盡誠膽幹殊
快殷元質略有明規文武可施用榮族兄公讓明亮守
節困不易操會稽楊彥明謝行言皆服膺儒教足為公
望賀生沉潛青雲之士陶恭兄弟才幹雖少實事極佳
凡此諸人皆南金也

報虞預論楊方

賀循

此子開拔有志意只言異於凡猥耳不圖偉才如此其
父甚有奇名出其胸臆乃是一國所推如方者乃是荒

菜之特苗鹵田之善秀姿質已良但染未足耳移植豐壤必成佳穀

責子

湛氏陶侃母

汝為吏以官物見餉非惟不能益吾反以增吾憂也

荅庾亮

陶侃

古人三敗君侯始二當今事急不宜教爾

荅王敦

劉隗

魚相忘於江湖人相忘於道術竭股肱之力效之以忠

貞吾之志也

與王導

陸玩

昨食酪小過通夜委頓民雖吳人幾為傖鬼

臨終與庾亮書

孔坦

未謂疾苦遂至頓弊自省縣縣奄忽無日脩短命也將
何所悲但以身往名沒朝恩不報所懷未叙即命多恨
耳足下抗威顧盼名震天下橡椽之佐常顧下風使九
服式序四海一統若死而有靈潛聽風烈

荅諸葛恢

庾亮

賢女尚少故其宜也感念亡兒若在初沒

亮子婦為諸葛女將改適

與殷荊州

顧愷之

地名破冢真破冢而出行人安穩布颿無恙

與殷浩

庾翼

王夷甫先朝風流士也然吾薄其立名非真而始終莫取若以道非虞夏自當超然獨往而不能謀始大合聲譽極致名位正當抑揚名教以靜亂源而乃高談莊老

說空終日雖云談道實長華競及其末年人望猶存思
安競亂寄命推務而甫自稱述徇小好名既身困邊塵
棄言非所凡明德君子遇會處際寧可如是而世皆然
之益知名實之未定弊風之未革也

荅殷豫章送折角如意

庾翼

得所致雖是敗物猶欲理而用之

與羲之

庾翼

吾昔有伯英章草十紙過江亡失常歎妙迹永絕忽見

足下荅家兄書煥若神明頓還舊觀

楊云庾翼初不服右軍故有野雉之

言及見右軍與庾亮書乃深服之猶吳道玄之於張僧繇宋思陵之於吳傳朋也

與桓溫

孫盛

州遣從事觀採風聲進無威鳳來儀之美退無鷹鷂搏擊之用徘徊湘川將為怪焉

與支遁

謝安

思君日積計辰傾遲知欲還剡自治甚以悵然人生如寄耳頃風流得意之事殆為都盡終日蹙蹙觸事惆悵

唯遲君來以晤言消之一日當千載耳此多山水山縣
閒靜差可養疾事不異刻而醫藥不同必思此緣副其
積想也

荅王坦之

謝安

知君思想愛惜之至僕所求者聲謂稱情義無所不可
為聊以自娛耳若絜軌迹崇世教非所擬議亦非所屑
嘗謂君粗得鄙趣者猶未悟之濠上耶故知莫道未易
為人

與王羲之

謝安

敬和栖托好佳

荅謝安

王坦之

具君雅旨此是誠心而行獨往之美恐非大雅中庸之
謂意者以為人之體韻猶器之方圓方圓不可錯用體
韻豈可易處各順其方以弘其業則歲寒之功必有成
矣吾子少立德行體議淹允加以令地優游自居僉曰
之談咸以清遠相許至於此事實有疑焉公私二三莫

見其可以此為濠上悟之者得無鮮乎且天下之寶故
為天下所惜想君幸復三思

與韓康伯

俞益期

檳榔信南遊之可觀子既非常木亦特奇大者三圍高
者九丈葉聚樹端房棲葉下華秀房中子結房外其擢
穗似黍其綴實似穀其皮似桐而厚其節似竹而概其
內空其外勁其屈如覆虹其申如縋繩本不大末不小
上不傾下不斜稠直亭亭千百若一步其林則寥朗庇

其廕則蕭條信可以長吟可以遠想矣性不耐霜不得
比植必當遐樹海南遼然萬里弗遇長者之目自令人
恨深

與袁虎

郝超

殷子思求良朋託好足下勿以開美求之

劉孝標曰此語疑勸袁勿

友殷自藝其美 楊云世目袁為
開美故子敬詩曰袁生開美度

與弟姊

謝玄

此二日東行遊步園中已極有在家湖行模也姊想觸

此亦小有可散

與兄

謝玄

居家大都無所為正以垂綸為事足以永日北固山下
大有鱸魚一出手釣得四十九枚

與桓溫

習鑿齒

不遇明公荊州老從事耳

荅殷浩

王羲之

吾素志無廊廟王丞相欲內吾誓不許之手迹猶存由

來尚矣不於足下叅政而方進退俟兒婚女嫁便懷尚
子平之志數與親知言之非一日也

與吏部郎謝萬

王羲之

以君邁往不屑之韻而俯同羣辟誠難為意也然所謂
通識正自當隨事行藏乃為遠耳願君每與士之下者
同則盡善矣食不二味居不重席此復何有而古人以
為美談濟否所由實在積小以致高大君其存之

與會稽王

王羲之

今雖有可欣之會內求諸已而所憂乃重於所欣以區區吳越經緯天下十分之九不亡何待願令諸軍皆還保淮須根立勢舉謀之未晚

與桓溫

王羲之

謝萬才流經通處廊廟參諷議故是後來一器而今屈其邁往之氣以俯順荒餘近是違才易務矣

與周益州

王羲之

省足下別疏具彼土山川諸奇揚雄蜀都左太冲三都

殊為不備悉彼故為多奇益令其遊目意足也可得果
當告卿求迎少人足耳至時示意遲此期真以日為歲
想足下鎮彼土未有動理耳要欲及卿在彼登汶領峨
眉而旋實不朽之盛事但言此心以馳於彼矣

與謝安

王羲之

蜀中山水如峨眉
山夏含霜電
碑板之所聞崑崙之伯
仲也

與人

王羲之

張芝臨池學書池水盡黑使人眈之若是未必後之也

與兄子猷

王獻之

兄伯蕭索寡會遇酒則酣暢忘返乃可自矜

與袁宜都論嘯

桓玄

讀卿歌賦序詠音聲皆有清味然以嘯為髣髴有限不足以致幽音將未至耶夫契神之音既不俟多瞻而通其致苟一音足以究清和之極阮公之言不動蘇門之聽而微嘯一鼓玄默為之解顏若人之興逸響惟深也哉

荅索商

張天錫

吾非好行行有得也觀朝榮則敬才秀之士玩芝蘭則
愛德行之臣觀松竹則思貞操之賢臨清流則貴廉潔
之行覽蔓草則賤貪穢之吏逢颶風則惡凶狡之徒若
引而申之觸類而長之庶無遺漏矣

與子

陶潛

少來好書偶愛靜閒開卷有得便欣然忘食見樹木交
蔭時鳥變聲亦復歡爾有喜嘗亦五月中北窓下卧

遇涼風暫至自謂是羲皇上人

其二

汝旦夕之費自給為難今遣此力助汝薪水之勞亦人子也可善遇之

問行帖 無名氏

天氣且未佳汝定成行否寒食近得且佳為佳耳

楊云此帖

或以為真卿書非也乃真卿寫晉人帖辭耳或以為右軍帖亦無的證故標以無名氏附晉人雜帖云

宋辛稼軒詞宦游吾倦矣玉人留我住道明日是落花寒食得且佳為佳耳晉人之語一入聲律其妙如

此

與行脚僧

西竺十歲和尚

三峨高出五嶽秀甲九州震旦國第一山也

與祖逖

石勒

天下之惡一也叛臣逃吏吾之深仇將軍之惡猶吾惡也

荅王謚

佛圖澄

昔人不愛尺璧而重寸陰觀其所存似不在長年耳檀

越既履順而游性重佛理以御心因此而推復何羨之
於遐齡耶聊想斯理久以得之為復訓來性耳

與慕容垂

符詠

符堅王猛皆人傑也謀為燕患為日久矣今若垂機不
赴恐燕之君臣將有甬東之誨

答妻荅華書

竺僧虔

夫事君以治一國未若弘道以濟萬邦事親以成一家
未若弘道以濟三界髮膚不毀俗中之近言耳但吾德

不及遠未能兼被以此為愧然積篲成山亦冀從微至著也日披袈裟振錫杖飲清流詠波若雖王公之服八珍之饕餮鏘之聲煒燁之色不與易也若能懸契則同期於泥洹矣且人心各異有若其面卿之不樂道猶我之不慕俗矣楊氏長別離矣萬世因緣於今絕矣歲聿云暮時不我與學道者當以日損為志處世者當以及時為務卿年德並茂宜速有所慕莫以道士經心而坐失盛年也

文章辨體彙選卷二百六十一

欽定四庫全書

文章辨體彙選卷二百六十二

明 賀復徵 編

尺牘四

與子恢之

宋王敬弘

彼秘書有限故有競期請無限故無競吾欲使汝處不競之地

與弟晦

謝瞻

吾得啟體幸全亦何所恨弟思自勉勵為國為家

與廬陵王義真

謝靈運

會稽既豐山水是以江左嘉遯並多居之但季世慕榮
幽棲者寡或復才為時求弗獲從志至若王弘之拂衣
歸耕踰歷三紀孔淳之隱約窮岫自始迄今阮萬齡辭
事就閒纂成先業浙河之外棲遲山澤如斯而已既遠
同義唐亦激貪厲競殿下愛素好古常若布衣每意昔
聞虛想巖穴若遣一介有以相存真可謂千載盛美也

與弟

謝靈運

聞惡道溪中九十九里有五十九灘王右軍遊此惡道
歎其奇絕遂書突星瀨於石

荅丘珍孫

王僧達

褚先生從白雲舊矣古之逸人或留慮兒孫或使華陰
成市而此子索然唯朋松石介於孤峰絕嶺者積數十
載近故要其來此冀慰日夜比談討芝桂借訪薜蘿若
已窺烟波臨滄州矣知君欲見之輒當申譬

與顏竣

劉瑀

朱脩之三代叛兵也一朝居清油幕下作謝宣明面孔
向人

荅人勸仕

沈麟士

魚懸獸檻天下一契聖人玄悟所以每履吉先吾誠未
能景行坐忘何為不希企日損

荅吳興守張永

沈麟士

明府德履冲素留心山谷民是以被褐負杖忘其疲病

必欲飾混沌以蛾眉冠越客於蟬冕走雖不敏請附高
節有蹈東海而死耳未忍受此點剝

戒子

齊王僧虔

汝年入立境方應從宦兼有室累何處復得下帷如王
郎時耶各爾身已切豈復關吾耶鬼惟知愛深松茂栢
寧復知子弟毀譽因汝有感故畧叙胸懷

戒子

張融

吾生平所善自當凌雲一笑三千買棺無製新衾左手

執孝經老子右手執小品法華經以吾平生風調何至
使婦人行哭失聲不須暫停閨閣

與親知

劉休

虞公散髮海隅同古人之美而東都之送殊不藹藹

楊云

王儉與虞玩之言論相不饒玩之歸儉
不出送傾朝無餞者休與親知故云

答魚復侯

宗測

少有狂疾尋山採藥遠來至此量腹而進松朮度形而
衣薜蘿澹然已足豈容當此橫施

答豫章王

宗測

性同鱗羽愛止山壑眷戀松雲輕迷人路有若狂者忽
不知老至而今鬢已白豈容課虛責有限魚鳥慕哉

與謝淪

謝朓

今致數斛酒可力飲此勿豫人事

誠當陽公書

梁簡文帝

汝年時尚幼所闕者學可久可大其唯學與所以孔丘
言吾嘗終日不食終夜不寢以思無益不如學也若使

面牆而立沐猴而冠吾所不取立身之道與文章異立身先須謹重文章且須放蕩

荅虞中書書

陶弘景

栖六翮於荆枝望綺雲於青漢者有日于茲矣而春華來被草石開鮮辭動情端志交矜曲信知鄰德之談無虛往牘夫子雖迹纏朱閣而心期岱嶺豈但散髮乎高岫似將飛霜於絕谷良為欽哉野人幸得託形崇阜息影長林每對月流歎臨風軫慨徒事累可豁而髮容難待自非齊生

死於一致者能不心熱者乎舉世悠悠孰云同此倘遇知
已相與共憂竭來虞公茲焉可邁何為栖栖空勞鼓缶
迨及暇日有事還童不亦皎潔當年無忸前修也

山中荅謝中書書

陶弘景

山川之美古來共談高峰入雲清流見底兩岸石壁五
色交輝青林翠竹四時俱備曉霧將歇猿鳥亂鳴日夕
欲頽沉鱗竟躍實是欲界之仙都自康樂以來未復有
能與其奇者

報博士劉香書

沈約

生平愛嗜不在人中林壑之懽多與時奪日暮塗殫此
心往矣猶復少存閒遠徵懷清曠結宇東郊匪云止息
政復頗寄夙心時得休偃仲長游居之地休連所述之
美望慕空深何可髣髴君愛素情多惠以二贊辭采研
富事義畢舉句韻之間光影相照便覺此地自然十倍
故知麗辭之益其事弘多輒當置之閣上坐卧嗟覺

答郭峙書

劉峻

聞君子舊矣但人非豕鹿轉加遲滯波駁雨滯動間山
川故無由交羽觴薦雜佩睨浮雲以搔首臨清風而浩
歌變燧迴星亦云勞止

與施從事

吳均

故彭縣東三十五里有青山絕壁干天孤峰入漢綠嶂
百重清川萬轉歸飛之鳥千翼競來企水之猿百臂相
接秋露為霜春蘿被逕風雨如晦鷄鳴不已信足蕩累
頤物悟衷散賞

與朱元思

吳均

自富陽至桐廬一百許里水皆縹碧千丈見底游魚細
石直視無礙急湍甚箭猛浪若奔夾峰高山皆生寒樹
負勢競上互相軒邈爭高直指千百成峰泉水激石泠
泠作響好鳥相鳴嚶嚶成韻經綸昔務咸窺谷忘返矣

與何炯

劉孝標

訐超越俗如半天朱霞歆矯矯出塵如雲中白鶴皆
儉歲之梁稷寒年之織纈

荅袁聿脩

魏邢邵

老夫匆匆意不及此敬承此旨吾無間然弟昔為清郎
今日復作清卿矣

與王昕

北齊邢子良

賢弟彌郎意識深遠曠達不羈簡於造次言必詣理吟
咏情性往往麗絕恐足下方難為兄不暇憂其不進也

與人

唐王紹宗

鄙夫書無二者特由水墨之積習耳常精心率意虛神

卷一百六十二
靜思以取之吳中陸大夫常以余比虞君以不臨寫故也聞虞被中畫腹正與余同

寄東方虬

陳子昂

文章道喪五百年漢魏風骨晉宋莫傳然而有可證者
嘗觀齊梁詩彩麗競繁而興寄都絕每以永嘆昨見明
公孤桐篇骨氣端詳音韻頓挫有金石聲遂用洗心收
眎發揮幽鬱不圖正始之音復覩於茲

與韋五虛已書

陳子昂

命之不來也聖人猶無可柰何況於賢者哉僕嘗竊不自量謂以為得失在人欲揭聞見抗衡當代之士不知事有大謬異於此望者乃令人慚愧悔報不自知大笑顛蹶怪其所以者爾虛已足下何可言耶天道之將行也命也道之將廢也命也子昂其如命何雄筆雄筆棄爾歸吾東山無汨我思無亂我心從此遁矣屬病不得面談書以述言子昂白

招裴迪

王維

近瞻月下景氣和暢故山殊可過足下方溫經猥不敢
相煩輒獨往山中憇感配寺與山僧飯訖而去北涉玄
灞清月映郭夜登華子岡輞水淪連與月下上寒山遠
火明滅林外深巷寒犬吠聲如豹村墟夜春復與疎鐘
相間此時獨坐僮僕靜默多思曩昔攜手賦詩步仄逕
臨清流也當待春中卉木蔓發春山可望輕條出水白
鷗矯翼露濕青皋麥隴朝雉斯之不遠倘能從我遊乎
非子天機清妙者豈能以此不急之務相邀然是中有

深趣矣無忽因銜黃蘗人往不一

與魏居士

王維

古之高者曰許由挂瓢於樹風吹瓢惡而去之聞堯讓
臨水而洗其耳耳非駐聲之地聲無染耳之跡惡外者
垢內病物者自我此尚不能至於曠士豈入道者之門
歟近有陶潛不肯把板屈腰見督郵解印綬棄官去後
貧乞食詩云扣門拙言詞是屢乞而多慙也常一見督
郵安食公田數頃一慙之不忍而終身慙乎孔子曰我

則異於是無可無不可

與何員外書

元結

月日次山白何夫子執事皮弁時俗廢之久矣非好古君子誰能存之忽蒙見贈驚喜無喻次山漫浪者也苦
不愛便事之服時世之中昔年在山野曾作愚巾凡裘
異於制度凡裘領緇界緇緣緇帶其餘皆褐帶聯後縫
中腰前繫愚巾頂方帶方垂方緇葛為之玄絲為綾次
山自衣帶巾裘雖不為時人大惡亦嘗辱其嗤誚方欲

雜古人衣帶以自免辱贈及皮弁與凡裘正相宜若風
霜慘然出行林野次山則戴皮弁衣凡裘若大暑蒸濕
出見賓客次山則戴愚巾衣野服野服大抵緇褐布葛
為之也腰擔為裳短襟為衣裳下及屨衣垂及膝下不
審夫子異時歸休適在山野能衣戴此者不乎若以為
宜當各造一副送往元次山白

與朱滔

劉怱

昌平有太尉鄉司徒里不朽業也比忘上樂戰不顧成

敗如安史者今復何有司徒圖之無貽悔

與馮宿

韓愈

揚子雲著太玄人皆笑之子雲曰世不我知無害也後
世復有揚子雲必好之矣子雲死近千載竟未有揚子
雲可嘆也

與蕭俛

柳宗元

讒語轉侈囂囂嗷嗷漸成狂人飾智求仕者更詈僕以
悅讐人之心

寄元稹

白居易

僕去年秋始游廬山到東西二林間香爐峰下見雲水
泉石勝絕因置草堂前有喬松十數株脩竹千竿青蘿
為牆垣白石為橋道流水周於舍下飛泉落於簷間紅
榴白蓮羅生池砌每一獨往動彌旬日平生所好盡在
其中不惟忘歸可以終老

答張生

崔氏

玉環一枚是兒嬰年所弄寄充君子下體之佩玉取其

堅潔不移環取其終始不絕兼亂絲一絢文竹茶碾子
一枚此數物不足見珍意者欲君子如玉之貞敝志如
環不解淚痕在竹愁緒縈絲因物達誠永以為好耳幽
憤所鍾千里神合春風多厲強飯為佳

與王駕


司空圖

吾適已自編一鳴集且撐霆裂月訪作者之肝脾亦當
吾言之不忤也

荅田告

南唐徐鉉

負鼎叩角顧廬築巖各由其時不失其道在我而已何
常之有



文章辨體彙選卷二百六十二

欽定四庫全書

集部

文章辨體彙選卷二百六十三

詳校官中書臣寶汝翼

主事銜臣徐以坤覆勘

總校官檢討臣何思鈞

校對官中書臣葉蘭

謄錄監生臣李師弼

欽定四庫全書

文章辨體彙選卷二百六十三

明 賀復徵 編

尺牘五

與謝希深歐陽永叔

宋錢維演

山行良佳少留龍門賞雪無遽歸也

寓書夷簡

王至清

僕初與坦夫讀書山寺論家人一卦坦夫獨以孔子反

身二字為此卦入證語乃今天子第有取於威如之吉使天下夫婦之主不得終始其義坦夫獨不可以反身之說諫之而將順至此乎安在其有證於尼父之一言也僕今知讀書與仕宦自是兩截事幸哉天以布衣終我身也雖然坦夫自今永保祿位矣何者有所廢必有所愛能從人主所愛處有勲力焉亦必不愛爵祿以愛其人於衆人之外也此一牘也先為相業言後為相位賀惟坦夫兩受之

與范堯夫

司馬光

久絕榮進之心委順田里凡朝廷事未嘗挂慮數年以來昏忘特甚誠不意一旦冒居此地故事多所遺忘朝中士大夫百人所識不過三四如一黃葉在烈風中幾何其不危墜也又為世俗妄被以虛名不知其人實無所有上下責望不輕如何應副深望教督以所不及隨時示諭勿復形跡此不敢望於他人者也

答蔡天啓

王安石

近附書想達此日安否如何何時南來日以企佇得書
說同生基以色立是也所謂猶如野馬熠熠清擾者日
先入隙所見是也衆生以識精水合此而成身衆生為
想所陰不依日光則不能見想陰既盡心光發宣則不
假日光了了見此此即所謂見同生基也

滁上與梅聖俞書

歐陽修

去年夏中因飲滁水甚甘問之有一土泉在城東百步
許遂往訪之乃一山谷中山勢一面高峯三面竹嶺回

抱泉上舊有佳木一二十株乃天生一好景也遂引其
泉為石池甚清甘作亭其上號豐樂亭亦宏麗又於州
東五里許靈溪上有二怪石乃馮延魯家舊物移以至
亭前廣陵韓公聞之以細芍藥十株見遺亦植於其側
其他花竹不可勝紀山下一徑穿入竹篠蒙密中豁然
露盡遂得幽谷

與仲儀書

歐陽修

新歲晴和不審尊體何似湖園清曠春物嚮榮然尚在

過音必未欲會聚其如閒適之趣幽靜尤佳每苦紛勞
但深傾羨也老年相知無幾尺書相問畧亦無嫌餘暇
何惜數字少慰病翁然以自久無書不敢奉怪也

上宋舍人書

李觀

觀不肖竊謂文之於化人也深矣雖五聲八音或雅或
鄭納諸聽聞而淪入心竅不是過也嘗試從事於簡策
間其讀虛無之書則心頽然而厭於世觀軍陣之法則
心奮起而輕其生味縱橫之說則思譎詭而忘忠信熟

刑名之學則熹苛刻而泥廉隅誦隱遁之篇則意先馳於水石詠宮體之辭則志不出於區區文見於外心動乎中百變而百從之矣諒非淳氣素具通識旁照則為其所敗壞如覆手耳韓子有言曰儒以文亂德豈謂是乎然則聖君賢輔將以使民遷善而遠罪得不謹於文哉

與王安國

馮京

并門歌舞妙麗閉目不窺日以談禪為事

答馮京

王安國

若如所論未達禪理閉目不窺便是一重公案

與王慶源

蘇軾

高密風土食物稍佳但省租公庫減削索然貧儉始至
值歲飢人豪剽劫無虛日凡督捕姦宄五七十人近始
肅然鬪訟頗簡稍葺治園亭居之亦粗可樂但值登高
西南引領即悵然終日近稍能飲酒終日可飲十五銀
盞他日粗可奉陪於瑞州橋路上放訝倒載也

與王定國

蘇軾

數日卧病在告不審起居佳否知今日會兩婿清虛陰
森正好劇飲坐無狂客冰玉相對得無少澹否扶病暫
起見與子由簡大罵書尺往還正是攬人可憎之物公
乃以此為喜怒乎仙人王遠云得此書當復劇口大罵
之固應爾然而不可以徒罵也知公澹甚往發一笑

與蔡景繁

蘇軾

承愛女微疾今已必全安矣某病咳逾月不已雖無可

憂之狀而無憀甚矣臨臯南畔竟添却屋三間極虛敞
便夏蒙賜不淺胸山臨海石室信如所諭前某嘗攜家
一遊時家有胡琴婢就室中作獲索涼州凜然有冰車
鐵馬之聲婢去久矣因公復起一念若果遊此當有新
篇果爾者亦當破戒奉和也呵呵

其二

近來頗佳健一病半年無所不有今又一時失去無分
毫在者足明憂喜浮幻舉非真實因此頗知衛生之經

平日妄念雜好掃地盡矣公比來諸況何如刻刷之來
不少勞乎思渴之至非筆墨所能盡

與毛維瞻

蘇軾

歲云暮矣風雨淒然紙窗竹屋燈火青熒時於此間得
少佳趣無由持獻獨享為愧想當一笑也

與耘老

蘇軾

今日無別事舟中十指如懸槌適有人致嘉酒遂獨飲
一杯醺然徑醉念賈處士貧甚無以慰其意乃為作怪

石古木一紙每遇饑時輒以開看還能飽人否若吳興
有好事者能為君月致米三石酒三斛終君之世者便
以贈之不爾可令雙荷葉收掌須添丁長以付之也

答王敏仲

蘇軾

軾垂老投荒無復生還之望昨與長子邁訣已處置後
事矣今到海南首當作棺次當作墓仍留手疏與諸子
死即塋海外庶幾延陵季子贏博之義生不挈棺死不
扶柩此東坡家風也此外宴坐內照而已

與滕達道書

蘇軾

某閒廢無所用心專治經書一二年間欲了却論語書
易舍弟亦了却春秋詩雖拙學自謂頗正古今之誤粗
有益於世瞑目無憾往往又笑不會取快活是措大餘
業聞令子手筆甚高見其寫字想見其人超然者也

其二

示諭宜甫夢過於傳無有某聞見不廣何足以質然冷
暖自知殆未可以前人之有無為證也自聞此事而士

大夫多異論意謂中途必一見得相叅扣竟不果此意
衆生流浪火宅纏遶愛賊故為飢火所燒然其間自有
燒不著處一念清淨便不服食亦理之常無足怪者方
其不食不可強使食猶其方食不可強使之不食也此
間何必生異論乎願公以食不食為旦暮以仕不仕為
寒暑此外默而識之若以不食為勝解則與異論者相
去無幾矣偶蒙下問輒此奉廣而已不罪不罪

與王元直書

蘇軾

黃州真在井底杳不聞鄉國信息不審此日起居何如郎娘
各安否此中凡百粗遣江邊弄水挑菜便過一日每見一卽
報須數人下獄得罪方朝廷綜核名實雖才者猶不堪其任
况僕頑鈍如此其廢棄固宜但有少望或聖恩許歸田里得
數段一僕與子衆丈楊宗文之流往來瑞草橋夜還何村與
君對坐莊門喫瓜子炒豆不知當復有此日否存道庵忽使
我至今酸辛其家亦安在人還詳示數字餘惟萬萬保愛

與魯直書

蘇軾

晁君寄騷細看甚奇信其家多異材耶然有少意欲魯直以己意微箴之凡人文字務使平和至足餘溢為奇怪蓋出於不得已爾晁文奇怪似差早然不可直云爾非謂其諱也恐傷其邁往之氣當為朋友講磨之語乃宜不知公謂然否

與徐得之書

蘇軾

得之晚得子聞之喜慰可知不敢以俗物為賀所用硯一枚送上須是學書時矣知似太早然俯仰間便自見

其成立但催促吾儕日益潦倒耳恐得之惜別又復前去家中闕人抱孩兒深為不皇呵呵

答呂熙道書

蘇軾

南都住半月恍然如一夢耳思企德義每以悵然舍弟朴訥寡徒非長者輕勢重德誰肯相厚者湖州江山風物不類人間加以事少睡足真拙者之慶有幹不外

答參寥書

蘇軾

專人遠來辱手書并示近詩如獲一笑之樂數日喜慰

忘味也某到貶所半年凡百粗遣更不能細說大畧祇似靈隱天竺和尚退院後却在一箇小村院子折足鐺中糲米飯喫便過一生也得其餘瘡癘病人北方何嘗不病是病皆死得人何必瘡氣但苦無醫藥京師國醫手裏死漢尤多參寥聞此一笑當不復憂我也故人相知者即以此語之餘人不足與道也未會合間千萬為道善愛自重

答言上人書

蘇軾

去歲吳興倉卒為別至今耿耿譴居窮陋往還斷盡遠
辱不遺尺書見及感忤殊深比日法體佳勝扎翰愈精
健詩必稱是不蒙見示何也雪齋清境發於夢想此間
但有荒山大江修竹古木每飲村酒醉後曳杖放脚不
知遠近亦曠然天真與武林舊遊未見議優劣也何時
會合一笑惟萬萬自愛

與徑山長老

蘇軾

嶺南萬里不能死而歸宿田野遂有不起之憂豈非命

也夫然死生亦細故耳無足道者唯為佛為法為衆生
自重

寄子瞻書

佛印

嘗讀退之送李愿歸盤谷序愿不遇於主上者猶能坐
茂樹以終日子瞻中大科登金門上玉堂遠放寂寞之
濱權臣忌子瞻為宰相耳人生一世間如白駒之過隙
三二十年功名富貴轉盼成空何不一筆勾斷尋取自
家本來面目萬劫常在永無墮落縱未得到如來地亦

可以駢駕鸞鶴翱翔三島為不死人何乃膠柱守株待
入惡趣昔有問師佛法在甚麼處師云在行住坐卧處
著衣喫飯處沒理沒會處死活不得處子瞻胸中有萬
卷書筆下無一點塵到這地位不知性命所在一生聰
明要做甚麼三世諸佛則是一箇有血性的漢子子瞻
若能脚下承當把一二十年富貴功名賤如泥土努力
向前珍重珍重也

答陳師仲

蘇轍

轍少好為詩與家兄子瞻所為多少相若也子瞻既已得罪轍亦不復作詩然今世士大夫自亦不喜為詩以詩名世者蓋無幾人間有作者尤足貴也故僕得其所為輒諷詠終日譬如新病瘡人口不復歌聞有歌者猶能手足舞蹈以自慰釋足下尚能以五百篇見惠耶苟有以慰我不必矜自口出也

與胡少汲書

黃庭堅

庭堅叩頭晁嫂必孝友解事家居惟雍睦則不以細故

傷大義亦使亡者無憾于下泉矣念兄當此多難能自奮發否公學道頗得力耶治病之方當深求禪悅照破生死之根則憂畏淫怒無處安脚病既無根枝葉安能為害投子聰老是出世宗師海會演老行不愧古人皆可親近殊勝從文章之士學妄言綺語增長無明種子也聰老尤喜接高明士大夫渠開卷論說便穿得諸儒鼻孔若于義理得宗趣却觀舊所讀書境界廓然六通四闕極省心力也然有道之士須以至誠懇惻歸向古人

所謂下人不精不得其真此非虛語

答晦夫衡州使君書

黃庭堅

望之去後想令弟必將沂國入城其人亦肯調伏成家
否諸子弟有從學之所否人生須輟生事之半養一佳
士教子弟為十年之計乃有可望求得佳士既資其衣
食溫飽又當尊敬之而不倦乃可以盡君子之心而享
其功每見士大夫家養門客畧與僕使同耳如此何緣
得佳士藝麻必不能為粟也向見令嗣眉目明秀但患

未得師友耳厲之人夜半而生子求火甚急惟恐其似
已也況長者乎無緣會面聊寄一笑

與李端叔書

黃庭堅

數日來驟煖瑞香水仙紅梅盛開明牕淨室花氣撩人
似少年時都下夢也但多病之餘懶作詩耳公比來亦
游戲翰墨間耶比得荊州一詩人高荷極有筆力使之
陵厲中州不減晁張但公不識耳

與元不伐

黃庭堅

所諭家徒四壁應舉蹉跎貧者士之常富貴在天安可
人力較耶知寸心不與萬物俱盡則在此不在彼矣千
萬開拓胷次衡門之下古人不遠

其二

知命挾雌將雛下荆峽迎元明未得近音也文章殊不
能下筆蓋才智與齒髮俱衰憂病又侵其半所謂吾猶
昔人也有放浪石刻數種亦可以見其衰颯散誕矣

投知己書

張耒

古之致精竭思以事一藝而其知不分者其心之所思
意之所感必能自達於其技使人觀其動作變態而逆
得其悲歡好惡之微情故工樂者能使喜愠見於其聲
工舞者能使欣戚見於其容當其情見於物而意洩於
外也蓋雖欲自掩而不可得昔伯牙之所好者琴耳鍾
子期坐而聽之而伯牙不能藏其微情夫伯牙之情豈
與情謀哉惟其專意一心以事其技故意之所動默然
相授而不自知也

答汪信民書

張耒

抑聞古之文章雖制作之體不一端大抵不過記事辨理而已記事可以垂世而辨理足以開物皆辭達者也雖然有道辭生於理理根於心苟邪氣不入於心僻學不記於耳目中和正大之氣溢於中發於文字言語未嘗不明白條暢盡觀於語者乎直者文簡事核而理明雖使婦女童子聽之而喻曲者枝詞游說文繁而事晦讀之三反而不見其情此無待而然者也

與黃魯直書

陳師道

邇來起居何如不至乏絕不何以自存有相恤者不令
子能慰意不風土不甚惡不平居有可與語者不仕者
不相陵不何以遣日亦著書不近有人傳謁金門詞讀
之爽然便如侍語未知此生亦復能相從如前日不

與胡樞密

孫覿

新第落成市聲不入耳俗軌不至門客至命坐青山當
戶流水在左輒談世事便當以大白浮之使不得言也

與李尚書

孫觀

省書喜聞眠宿大佳觀已遂首丘而公亦安於閒寂相望耿耿如太白之配殘月也

與陳同甫書

呂祖謙

人至辱示字欣審秋晚氣清尊候萬福某官次粗遣而沈迷書冊中他無所預粗可藏拙但冗食極不遑安耳垂諭脩悉雅意再三玩繹辭氣樂和殊少感慨悲壯之意極以為喜驅山塞海未足為勇惟收歛不可歛之氣

伏槽安流乃真有力者也人回匆匆作此他祈厚為道
義護愛

答汪尚書書

朱熹

中國所恃者德夷狄所恃者力今慮國事者大抵以審
彼已較強弱為言是知夷狄相攻之策而未嘗及中國
治夷狄之道也蓋以力言之則彼常強我常弱是無時
而可勝不得不和也以德言之則振三綱明五常正朝
廷厲風俗皆我之所可勉而彼之所當服者是乃中國

治夷狄之道而今日所當議也誠能自厲以此則亦何以講和為哉愚之所憂獨恐力既不振德又不修則曰戰曰和俱無上策耳

答陳膚仲書

朱熹

承以家務叢委妨於學問為憂此固無可奈何者然亦只此便是用功實地但每事看得到理不令容易放過更於其間見得平日病痛痛如剪除則為學之道何以加此若起一脫去之心生一排遣之念則理事却成兩

截讀書亦無用處矣但得少間隙時不可閒坐說話過了時日須偷些小功夫看些小文字窮究聖賢所說底道理乃可以培植本原庶幾枝葉自然長王耳

劉伯協

陸九淵

人家之興替在義理不在富貴假令貴為公相富等崇愷而人無義理正為家替若簞食瓢飲肘見纓絕而人有義理正為家興吾人為身謀為子孫謀為親戚謀皆當如此然後為忠其自謀者或不然亦是不忠於吾身

矣

與繆知府

文天祥

天祥茅屋三間在萬山深處借書沽酒外一毫不以公
私撓獨蒔松百畝日騎牛扣角其間天惠仁侯自此吏
不打門犬不夜吠猿呼虎嘯各適其適則某受賜多矣

與朱太博

文天祥

聞車騎在郊外政欲嗣訊韓星忽來偉然朶雲之贈故
人渠渠勞苦行役諸兒那識此意曉起入山新流沒岸

棋聲未盡石骨依然人生往往如此可超然一笑承有
訪沙之約上已前後擬山行數日須主人在竹所可乘
興分沙一席已戒白鷗退避矣呼燈走筆馳意沈寥

與趙子昂評書

元鮮于樞

張長史懷素高閑皆名善草書長史顛逸時出法度之
外懷素守法特多古意高閑用筆粗十得六七耳至山
谷乃大壞不可復理

與張伯雨

虞集

承舍福真便向江東西名山縱游此最上奇事惟在勇
為仙真神人即未便居天上要亦不肯來塵中汨汨山
水勝處多所恒遊願吾伯雨早有玄遇某俗緣未了此
事但輸一籌先耳

與介石倪瓚

瓚奉別後從蘭陵東郭門外人家少憩三日待荆溪發
行李來即歸田舍到家稍稍休歇而州縣科差迫促騷
然因嘆那能復以憤憤從彼之榛榛乎便命扁舟入吳

寓村落中調氣靜坐得以少抒其中磊磊者一日從一
二林下人登靈巖山覽觀天池石壁之勝尋姑胥臺古
跡若司馬子長蘇長公悲世憤俗有不勝其哀後百世
而不及見古人則求古跡觀以自解惜不肖非其人回
望太湖之西諸山依約指點數螺若芥舟汎汎杯中
者當是銅雲離墨因並吾寄止公政著白雲滅沒處杜
門著書降屈其心志不能以道表見於當世真為泣下
沾襟也

文章辨體彙選卷二百六十三